

Statuts dil consorzi da scola dallas vischnauncas da Laax, Falera, Sagogn e Schluein

Sebasond sigl art. 20 dalla Lescha davart las scolas popularas dil cantun Grischun (lescha da scola) dils 21 da mars 2012.

Denominaziuns da personas, da funcziuns e da professiuns en quels statuts serefereschon ad omisduas schlatteinas, schinavon ch'ei seresulta buc enzatgei auter ord il cuntegn dils singuls artechels.

I. Disposiziuns generalas

art. 1

Num e sedia

¹ Sut il num «consorzi da scola dallas vischnauncas da Laax, Falera, Sagogn e Schluein» (suandontamein consorzi da scola) exista ina corporaziun da dretg public el senn digl art. 51 ss. dalla Lescha da vischnauncas dil cantun Grischun

² Il consorzi da scola ha sia sedia a Laax.

art. 2

Intent,
liug da scola

¹ Il consorzi da scola meina sco corporaziun dallas quater vischnauncas la scoletta, la scola primara ed il scalem superiur el senn dalla legislaziun cantunala.

² Il consorzi da scola s'obligescha

- da menar en mintga vischnaunca ina scoletta e d'instruir leu ils scolarets;
- da menar en mintga vischnaunca silmeins duas partiziuns primaras e d'instruir ils scolars u ell'atgna vischnaunca ni ella vischnaunca vischina (sco vischnauncas vischinas valan Laax e Falera sco era Sagogn e Schluein);
- d'instruir tut ils scolars dil scalem superiur ell'atgna scola superiura;
- d'installar ina direcziun da scola communabla che cumpeglia ina direcziun generala da scola, menaders da scola locals ed in secretariat da scola central.

³ Scolars che frequentan ina scola speciala externa, ina scola privata ni ina scola media ein deliberai da frequentar la scola el consorzi. En cass che ulteriuras scolas buca numnadas cheu vegnan frequentadas, ston las personas responsablas per l'educaziun inoltrar alla cumissiun da scola il mussament che l'obligaziun d'ir a scola vegni ademplida.

⁴ Ils loghens da scola per la scoletta e per la scola primara ein Laax, Falera, Sagogn e Schluein. Il scalem superiur sesanfla a Laax.

art. 3

Fundaziun

La fundaziun dil consorzi da scola succeda cul conclus dallas radunonzas communalas dallas vischnauncas dil consorzi da scola (suandontamein radunonzas communalas).

II. Organisaziun

art. 4

Organs

Ils organs ordinaris dil consorzi da scola ein:

- a) la radunonza communal;
- b) la cumissiun da scola;
- c) la direcziun da scola;
- d) la cumissiun da gestiun dil consorzi da scola.

art. 5

Incumpatibilitad

¹ Personas parentadas e personas parentadas entras maridaglia en lingia directa, fargliuns, conjugals e personas che vivan en in partenadi registrau ni en in concubinad astgan buc esser il medem mument ella cumissiun da scola e/ni ella cumissiun da gestiun.

² Personas emploiadas dil consorzi da scola astgan ni appartener alla cumissiun da scola ni alla cumissiun da gestiun.

a) Radunonzas communalas

art. 6

Incumbensas e cumpetenzas

Las radunonzas communalas han las suandontas incumbensas e cumpetenzas:

1. relaschar ils statuts e decider midadas da quels;
2. relaschar igl uorden da scola e decider midadas da quel;
3. decider en damondas dil consorzi da scola sin proposta dalla cumissiun da scola;
4. prender encunter ed approbar il quen annual, il preventiv ed il rapport da revisiun;
5. reglar l'indemnisaziun dalla cumissiun da scola;
6. decider sur dall'entrada d'autras vischnauncas el consorzi da scola;
7. abolir il consorzi.

Ils puncts 1 tochen 7 valan sco acceptai, sche tut las radunonzas communalas approbeschan els .

art. 7

Dretg d'iniziativa

¹ Ina iniziativa alla cumissiun da scola san far;

- a) la suprastanza d'ina vischnaunca dil consorzi ni
- b) silmeins 100 votantas e votants dallas vischnauncas dil consorzi.

² L'iniziativa sa vegnir inoltrada en fuorma d'in impuls general ni d'in sboz elaborau. Iniziativas nunvaleivlas ni illegalas renviescha la cumissiun da scola cun in'argumentaziun.

³ Iniziativas valeivlas – eventualmein en colligaziun cun ina cunterproposta – ston vegnir suttamessas allas radunonzas communalas per votaziun enteifer nov meins dapi l'inoltraziun.

⁴ Ina iniziativa sa vegnir retratga dils tschun emprems sutsignai tochen alla fixaziun dalla votaziun dil pievel, schinavon ch'ella cuntegn buc in'otra clausla da retratga.

art. 8

Proceder da votaziun

¹ La votaziun davart projects da lescha fa mintga vischnaunca tenor siu dretg vertent. Subsidiarmein vala la lescha davart dils dretgs politics dil cantun Grischun.

² Tractandas dil consorzi da scola ston vegnir suttamessas allas radunonzas communalas per votaziun enteifer sis meins dapi la consigna entras la cumissiun da scola.

³ Propostas dalla cumissiun da scola valan sco approbadas, sche tut las vischnauncas dil consorzi da scola approbeschan ellas.

b) Cumissiun da scola

art. 9

Cumposiziun

¹ Mintga vischnaunca dil consorzi deleghescha in commember ella cumissiun da scola.

² Per regla sorprendan ils geraus da scola dallas singulas vischnauncas quell'incumbensa.

³ Ils presidents communalas elegian in ulteriur commember dalla cumissiun da scola. Quel dispona da cumpetenzas cumprovadas sil camp dalla direcziun e dalla formaziun e surpren il presidi dalla cumissiun da scola.

⁴ Il temps d'uffeci dils commembers dalla cumissiun da scola sedrezza tenor il dretg communal respectiv. Igl engaschament dil president dalla cumissiun vegn reglaus en in contract da lavur.

art. 10

Incumbensas e cumpetenzas

La cumissiun da scola meina il consorzi da scola. En special eis ella responsabla per la direcziun strategica dil consorzi da scola. Ella procura che la scola adempleschi las pretensiuns legalas dalla Confederaziun, dil Cantun e dil consorzi. Ella ademplescha tut las incumbensas dil scolaesser ch'ein buca adossadas tenor la lescha cantunala ni tenor quels statuts ed igl uorden da scola ad in'otra autoritad ni instanza. Ella ha las suandontas incumbensas:

1. determinar l'orientaziun strategica dalla scola, fixar las finamiras annualas e decider en cunvegna culla direcziun da scola projects da svilup e mesiras da qualitat dalla scola;
2. menar, engaschar e relaschar la direcziun da scola;
3. eleger e relaschar persunas d'instrucziun ed ulteriur personal dil consorzi da scola sin proposta dalla direcziun generala da scola;
4. fixar las cundiziuns d'engaschament per persunas d'instrucziun incl. las categorias da paga el rom dalla legislaziun cantunala;

5. elaborar in uorden da scola per mauns dallas radunonzas communalas e dil Departament d'educaziun, cultura e protecziun digl ambient dil Grischun;
6. approbar e relaschar igl uorden disciplinar ed eventualmein d'ulteriurs reglaments sin proposta dalla direcziun da scola;
7. relaschar diagrams da funcziun e carnets da duers per la direcziun da scola;
8. elaborar ed adattar contracts da locaziun per mauns dallas suprastonzas communalas;
9. elaborar il rapport annual, il preventiv ed il quen annual per mauns dallas suprastonzas communalas che suttamettan quels documents allas radunonzas communalas per approbaziun.

art. 11

Sesidas e
cumpetenzas da
decider

¹ La cumissiun da scola vegn convocada da siu president aschi savens sco necessari ni sch'in commember dalla cumissiun da scola pretenda quei. Igl invit succeda per regla tschun gis avon cun indicar las tractandas.

² Per regla participescha la direcziun generala da scola allas sesidas dalla cumissiun da scola cun vusch consultativa.

³ Igl ei da menar protocol dalla sesida.

⁴ La cumissiun da scola ei cumpetenta da decider, sche silmeins treis commembers ein presents.

⁵ Mintga commember dalla cumissiun ei obligaus da votar. Per tut las votaziuns ed elecziuns vala igl absolut pli dallas persunas presentas. Quei cun resalva dallas disposiziuns tenor igl art. 33 dalla Lescha da vischnauncas dil cantun Grischun partenent la recusaziun.

⁶ En cass da paritad da vuschs en damondas materialas decida il president, el rom dad elecziuns decida la sort.

art. 12

President

¹ Il president prepara, envida e meina las sesidas. El procura per l'execuziun dallas decisiuns. El ei responsabels per la correspondenza ed elaborescha ensemen culla cumissiun e la direcziun da scola il rapport annual per mauns dallas radunonzas communalas.

² En cass urgents pren el – ensemen culla direcziun generala da scola ni cun in ulteriur commember dalla cumissiun – las decisiuns necessarias. Posteriuromein ha el da presentar la fatschenta alla cumissiun da scola.

art. 13

Representanza
anoraviars

¹ La cumissiun da scola representa il consorzi da scola enviars tiarzas persunas, avon autoritads ed avon dertgira. Il president representa la cumissiun da scola.

² La suttascripziun giuridicamein valeivla pil consorzi da scola dattan collectivamein en dus il president ni in auter commember dalla cumissiun da scola e la direcziun generala da scola resp. sia substituziun.

c) Direcziun da scola

art. 14

Engaschament
dalla direcziun da
scola

¹ Il consorzi da scola installescha ina direcziun da scola.

² La direcziun da scola seconstituescha d'ina direcziun generala da scola, mintgamai d'in menader da scola local per la scoletta e la scola primara da Laax-Falera e la scoletta e la scola primara da Sagogn-Schluein e d'in menader dil scalem superiur.

³ Igl engaschament dallas direcziuns da scola vegn reglaus cun in contract da lavur da dretg public che riguarda il dretg cantunal.

art. 15

Incumbensas e
cumpetenzas

La direcziun da scola responsescha il menaschi operativ dalla scola. Incumbensas e cumpetenzas vegnan regladas en in carnet da duers per la direcziun generala da scola, pils menaders da scola locals e pil menader dil scalem superiur.

d) Cumissiun da gestiun

art. 16

Cumposiziun

¹ La cumissiun da gestiun secumpona mintgamai d'in representant da mintga vischnaunca dil consorzi.

² Ils commembers dalla cumissiun da gestiun vegnan eligi ord las atgnas retschas dalla cumissiun da gestiun respectiva dallas vischnauncas dil consorzi.

art. 17

Incumbensas e
responsabladads

¹ La cumissiun da gestiun controllescha mintg'onn il quen e la gestiun dil consorzi da scola sco era l'activitad dalla cumissiun da scola. Ella sa consultar il post da controlla extern dalla vischnaunca dil consorzi che fa la contabilitad. Ella rapporta a scret per mauns dallas radunonzas communalas e fa ina proposta.

² La cumissiun da gestiun sa far diever da siu dretg da controlla da tuttas uras e senza preannunzia. Ella ha investa ellas actas.

III. Stabiliments e transports da scola

art. 18

Infrastructura
scoletta

¹ Il consorzi da scola drova per la scoletta ils stabiliments da mintga vischnaunca dil consorzi.

² Las vischnauncas mettan a disposiziun al consorzi da scola sin agen quen las localitads necessarias e l'infrastructura da basa tenor punct 1.

art. 19

Infrastructura
scola primara

¹ Las vischnauncas mettan a disposiziun al consorzi da scola las localitads necessarias e l'infrastructura da basa per la scola primara.

² Il consorzi da scola ei locatari dallas vischnauncas.

³ Ils detagls vegnan reglai el contract da locaziun.

art. 20

Infrastructura
scalem superiur

¹ Las vischnauncas mettan a disposiziun al consorzi da scola las localitads necessarias e l'infrastructura da basa pil scalem superiur.

² Il consorzi da scola ei locatari dallas vischnauncas.

³ Ils detagls vegnan reglai el contract da locaziun.

art. 21

Infrastructura
structuras dil gi

¹ Il consorzi da scola organisescha las structuradas dil gi ellas vischnauncas dil consorzi. Las vischnauncas mettan a disposiziun las localitads necessarias.

² Il consorzi da scola ei locatari dallas vischnauncas.

³ Ils detagls vegnan reglai el contract da locaziun.

art. 22

Transports da
scola

¹ Il consorzi da scola organisescha ils transports da scola pils scolars dalla scola primara e superiura denter las vischnauncas dil consorzi.

² Ils cuosts da menaschi pils transports dalla scola primara e dil scalem superiur vegnan pagai tenor igl art. 24 dil consorzi da scola.

IV. Finanzas

art. 23

Onn da gestiun

Igl onn da gestiun dil consorzi da scola cuoza mintgamai digl 1. d'uost tochen ils 31 da fenadur.

art. 24

Cuosts

Sco cuosts da menaschi e d'administraziun dil consorzi da scola valan:

1. salarisaziun incl. prestaziuns socialas da tut il personal dil consorzi da scola;
2. expensas per la formaziun supplementara dallas persunas d'instrucziun;
3. cuosts da locaziun per las localitads da scola e pil condiever da parts dils baghetgs e dils stabiliments;
4. acquisiziuns novas e manteniment dil mobiliar;
5. expensas per material d'instrucziun e d'administraziun;
6. expensas per medias electronicas;
7. expensas per excursiuns ed occurrenzas da scola;
8. cuosts da transport pils scolars primars e pils scolars dil scalem superiur;
9. indemnizaziun dalla cumissiun da scola;
10. indemnizaziun per far la contabilitad;
11. premias per las assicuranzas necessarias tenor igl art. 52 dalla lescha da scola;
12. ulteriuras expensas en connex culla scola;

La scolaziun e promoziun d'affons e da scolars ordeifer il consorzi da scola e las structuradas communalas (scola speciala, scola media, scola en spital ni

en casas d'educaziun) pagan las vischnauncas da domicil sezzas e buc il consorzi da scola.

art. 25

Repartiziun dils
cuosts

¹ Cuosts da menaschi e d'administraziun tenor igl art. 24 vegnan – suenter la deducziun dallas entradas e dallas contribuziuns dil Cantun – reparti proporziunalmein tenor il diember da scolars da mintga vischnaunca dil consorzi. Quei succeda ellas spartas scoletta, scola primara e scalem superiur.

² Sco gi da referenza pil diember da scolars vala il datum per fixar las contribuziuns cantunalas digl Uffeci per la scola populara ed il sport.

³ Per scolars che entran ni che extreschan duront igl onn da scola vegnan ils cuosts da scola calculai per meins (meins entschats vegnan quintai cumpleinamein).

art. 26

Cumpetenzza
finanziala dalla
cumissiun da
scola

La cumpetenzza finanziala annuala dalla cumissiun da scola munta a CHF 20'000.00 per expensas buca preventivadas.

V. Giurisdicziun

art. 27

Dretg da recuors

Decisiuns e disposiziuns dalla cumissiun da scola en fatgs da scola san vegnir contestai giudizialmein tenor la lescha da scola enteifer 10 gis dapi la comunicaziun al Departament d'educaziun, cultura e protecziun digl ambient.

art. 28

Dretg da purtar
plogn

Per dispetas denter il consorzi da scola e las vischnauncas dil consorzi ni denter las vischnauncas vala la lescha davart la giurisdicziun administrativa dil cantun Grischun.

VI. Disposiziuns transitorias e finalas

art. 29

Entrada en vigur

¹ Suenter l'approbaziun entras las radunonzas communalas ein ils statuts legalmein valeivels.

² L'instrucziun el consorzi da scola entscheiva igl onn da scola 2022/23.

art. 30

Entrada, extrada

¹ Las vischnauncas dil consorzi decidan sur d'entradas d'autras vischnauncas.

² Ina vischnaunca dil consorzi sa extrar dil consorzi sil pli baul suenter in commembradi da minimum tschun onns e quei cun risguardar in termin da visada da dus onns silla fin d'in onn da scola. La visada sto vegnir inoltrada al consorzi da scola tochen ils 31 da december digl onn precedent.

³ En cass d'ina fusiun da vischnauncas sa l'extrada succeder cun in termin da visada extraordinari da silmeins treis meins sil datum dalla fusiun.

⁴ Scolars ch'ein da quei temps el consorzi da scola fineschan lur entira scolaziun obligatoria restonta el consorzi.

⁵ Vischnauncas che extreschan dil consorzi da scola han negin dretg silla facultad dil consorzi ni sin ina restituziun dallas atgnas prestaziuns.

⁶ La responsablada d'ina vischnaunca che extrescha dil consorzi da scola resta en vigur enviers il consorzi da scola per tut las obligaziuns pridas avon e tochen l'extrada.

art. 31

Aboliziun

¹ Sche duas ni dapli vischnauncas dil consorzi extreschan il medem mument dil consorzi da scola, vegn quel aboliu.

² En cas d'ina aboliziun dil consorzi da scola sto la regulaziun dalla responsablada enviers ils debitors e la liquidaziun d'ina eventuala facultad e la repartiziun da quella vegnir approvada da tut las vischnauncas dil consorzi.

Approbau dallas radunonzas communalas

Laax, ils *08.12.2021*

president communal



scarvon communal



Falera, ils *10.12.2021*

president communal



scarvon communal



Sagogn, ils *03.12.2021*

president communal



scarvon communal



Schluein, ils *15.12.2021*

president communal



scarvon communal

